

Ambasadori Upravnog odbora Vijeća za provedbu mira izrazili podršku Odluci visokog predstavnika o Memorijalnom centru Srebrenica-Potočari

Na današnjem sastanku, ambasadori Upravnog odbora iz Kanade, Francuske, Njemačke kao predsjedavajuće EU, Italije, Japana, Nizozemske, Španije, Turske kao predstavnika Organizacije islamske konferencije, Velike Britanije, Sjedinjenih Američkih Država i Evropske komisije danas su podcrtali svoju podršku Odluci visokog predstavnika o donošenju Zakona o Memorijalnom centru Srebrenica-Potočari *Spomen obilježje i mezarje za žrtve genocida iz 1995. godine.*

Memorijalni centar Srebrenica-Potočari je pravno lice koje su osnovale institucije Bosne i Hercegovine i koje je registrovano kao takvo u skladu sa odgovarajućim zakonima Bosne i Hercegovine. Memorijalni centar je jedan od ključnih elemenata potrebnih da bi se ova zemlja mogla suočiti sa užasnim stradanjima koja su rezultirala iz genocida koji je počinjen u Srebrenici 1995. godine, i prihvati ih.

Navedeni ambasadori Upravnog odbora podsjećaju da su u izvjesnim političkim reakcijama na ovu Odluku pogrešno interpretirani i njen sadržaj i namjera. Odlukom se definiraju odgovornosti Države u pogledu Fondacije, čime se osigurava budućnost njenog daljeg djelovanja. Ova odluka se ne odnosi niti implicira ni direktno niti indirektno bilo kakav oblik izmjene statusa Općine Srebrenica, niti Republike Srpske, odnosno ustavnog poretka Bosne i Hercegovine. Ona također ne utiče ni na odgovornost policije Republike Srpske za održavanje javnog reda i mira u Republici Srpskoj. Nadležne institucije, uključujući i agenciju SIPA i policiju Republike Srpske će biti zadužene za sveukupnu sigurnost prilikom komemoracije 11. jula u skladu sa njihovim odgovarajućim zakonskim obavezama. Od imperativnog je značaja da ove agencije koordiniraju svoje napore kao što su to činile i u prošlosti.

Ovi ambasadori Upravnog odbora su istakli i Deklaraciju koju je usvojilo Vijeće za implementaciju mira prošle sedmice, u kojoj se izričito navodi da se status Srebrenice i status bilo koje druge jedinice uprave u Bosni i Hercegovini može mijenjati jedino u skladu sa odgovarajućim ustavima i zakonima. Oni su ponovili da Vijeće za implementaciju mira neće prihvati bilo kakve promjene niti pozive na promjene kojima se krše ovi zakoni.

Ovi ambasadori Upravnog odbora podsjećaju sve organe vlasti u BiH na njihovu obavezu da u potpunosti poštuju i provode Odluku visokog predstavnika i očekuju da je i ispune.